

# 申報

甲戌年五月

二十日

西曆七月十三日即禮拜五

## 臺灣近勢

自東人涉履臺灣以來其先後各情本館曾已陸續登錄顯皆藉西人轉遞而西人又不通於曉語及日本之言則其傳述或不免有失確處本館居心務求其實纖細不遺是以於月前曾經特派華友徑赴臺灣戰場以記述諸事一俟獲音郵至則或能少補先時之所述而軍情當更得詳確焉茲姑就各報所得之耗以總核近日臺灣之勢蓋東兵多寡傳者不一大抵約有四千人其內爲兵者則三千五百名而已各生番以其器藝之精訓練之善自覺不克與之爲敵故少有不求和者惟白黨一大社並別有數小社勢若不共戴天此東人所特與爲讐若不滅此而不可朝食焉夫白黨境內最强極衆之社既與東兵相角而不敵且復爲敵所乘則惟有棄村墟舍廬室而退入深山之巢窟靜以待時矣於是乎通島生番之各曠地皆爲東人蹂躪且分駐小營以聯絡聲勢爲鎮守計又設法將山內強悍之番人皆漸次以歸服然則其讐人經兩次敗績焚其鄉戮其衆使餘黨或皆餓餓於山內東人已可謂大示懲戒而又復何求乎乃不顧即撤兵竟蓋造房屋而分設大營以扼守發回戰艦而出示以該地爲東洋所屬下既與各生番結約又於華村民議和且更於國內復召募兵丁每日操練以加威於我國則觀於此東人侵據之謀業已告成且又蠶食我中國王化之屬也東人在臺灣之勢如是既據其地猶稱欲與中國商議立約其欲立何約蓋不問而可知矣所以中國民人念及此事無不義憤塞胸將圖一戰然兵兇戰危古人所戒今之當事者既不加責言而反視爲緩圖是實從權之道也蓋既不能保萬全無失則莫若暫爲容忍今日東兵自守於臺灣即至後日亦仍不過在臺灣耳即稍延緩亦何妨碍夫東人在臺灣我國業經示戒則我國與立定疆之約又何爲乎若不立約而東人猶或越境以鄙遠則衆隣國當共不平而必思所以止之也然在閭閻所望於上者惟於整備後務必實心以集事水師事務尤宜精益求精若陸軍與其用多而不精者徒糜餉精不如少而精者之爲得也且不可以躁急蓋勇於前者怯於後恐少緩而即生懈怠也